

dum Topozka omnino quasi ruere videtur, fortalitiumque Prezeka imperfectum manet, quae in maximis confiniis et ad tuitionem Regni summe necessaria locata sunt: vniversae pertinentiae dictae Abbaciae cis et ultra Colapim existentes ad praefatum Oppidum Topozka et fortalitium Prezeka deputantur. Qui autem praemissa omnia adimplere negligerent, per omnia oportuna remedia compellantur.

Caeterum cum Capitulum Ecclesiae Chasmensis tam residentia, quam omnibus prouentibus per hostes fidei Christianae priuatum sit, Sigillum autem autenticum dicti Capituli apud certos Canonicos dictae Ecclesiae Chasmensis, hic Zagrabiae degentes et satis inopem vitam ducentes, pro summa necessitate iurium Regni et nunc existat; qui Canonici coram fidelibus Regnicolis Maiestatis Caesareae protestantes, Sigillum praefatum reddere, et se in aliena seruitia Ecclesiastica conferre volentes, quod non sine maximo detrimento Iurium Regni esset: propterea supplicant Status et Ordines Regni Maiestati Caesareae et Regiae, Domino ipsorum clementissimo, quum credant in partibus Hungariae Cisdanubianis vaccare Abbatias et Praeposuras, dignetur Sua Maiestas de aliquo vacante huiusmodi beneficio praefato Capitulo Chasmensi, vnde aliquos prouentus ad sustentationem quotidianae vitae habere possent, clementer prouidere.

Cum autem praefati Status et Ordines, fideles Regnicolae Maiestatis Caesareae, sepiissime pro rectificandis metis inter Sclavoniam Styriamque et Carniolam suae Sacrae Maiestati supplicasse recordantur, et nunc supplicant humillime, dignetur Maiestas sua Caesarea et Regia, ob summam paternam clementiam erga fideles subditos suos, apud Serenissimum Dominum Archiducem Carolum Fratrem suum charissimum efficere, ut Maiestates suae vnanimi voto speciales transmittant suos Commissarios, qui huiusmodi metas inter praescripta Regna rectificare valeant, ne creberrimi tumultus inter fideles Regnicolas praefatorum Regnorum Maiestatum suarum ratione dictarum metarum oriantur, potissimum vero inter Zomzedwara, Bresecz, Mokrycza, Lyppovacz et Jaztrebarzka.

Id quoque fideles Regnicolae Maiestati suae Caesareae et Regiae significandum curarunt, saepissimas contra milites stipendiarios Equites suae Sacrae Maiestatis, tam in Confiniis Croatiae quam Sclavoniae constitutos, a miseris Nobilibus Regnicolis ad Dominos Banos deuenire quaerelas: Quod praefati nonnulli milites Equites Stipendiarii, nulla habita Dei et miserae plebis ratione, Equos ad pascua habentes, non tantum in fenilibus, sed in cunctis fere mobilibus rebus potissimum miserae plebis direptionem facere non cessant. Vnde supplicant humillime, Maiestas sua Caesarea et Regia, intellecta tam miserabili oppressione fidelium suorum, dignetur Dominis Banis simul et Dominis Vito ab Hallek et Herbarto Ausperger, Generalis Capitaneatus in Confiniis Regnorum Croatiae et Sclavoniae Locumtenenti, serio committere, vt mutua habita intelligentia, sine vltiori procrastinatione, Articulum Posoniensem Anni Millesimi Quingentesimi Sexagesimi Sexti, in talibus conclusum, nullo habito personarum respectu, reali executioni demandent, et spoliatis damnificatisque ex Stipendiis Militum satisfaciant.

Praeterea Nobiles Michael et Gregorius Herendych de Mlaka cum certis aliis Nobilibus fratribus et vicinis eorundem, in partibus transcolapinis commorantibus, lamentabili cum quaerela dictorum Statuum et Ordinum accedentes in praesentiam, retulerunt: Qualiter circa festum Beati Georgii Martyris proxime praeteritum, Wranes Jelenich ac Thomas Zeverovich, Vaivodae peditum Wzokorum, in Merzlopolya provincia Carniolae commorantem, ac sub Capitaneatu